

四庫全書

史部

欽定四庫全書

閩中理學淵源考卷八十三

廣平府知府李清馥撰

黃石齋先生道周學派

黃石齋先生道周

黃道周字幼元號石齋漳浦之銅山人少負奇節以孝聞年十四慨然有四方之志不肯治舉子業抵博羅謁韓大夫日纘韓家多異書得盡覽所未見嘗即席酒酣

援筆立就數千言名大噪天啓二年第進士選庶吉士  
歷編修監修國史實錄故事經筵展書官奉書膝行道  
周謂膝行非禮也平步進魏忠賢目攝之不為動未幾  
乞歸葬父石養山結廬其下旋丁內艱服闋還朝崇禎  
三年典試浙江以神宗實錄成晉右中允明年冬故相  
錢龍錫坐袁宗煥事被逮道周草疏救之貶秩鐫三級  
而龍錫卒得減死科臣有銜道周者撫浙江典試事蜚  
語上聞疏乞休許之瀕行上小人勿用疏蓋指輔臣溫

體仁周延儒也上怒削籍還至浙江學者聞道周至為  
築大滌書院而稟學焉歸至石養山守墓如新喪時踰  
年以有司請講學於郡治紫陽祠門人自遠至者可千  
人乙亥起補原官時方久旱五月內繫雨尚書道周疏  
請慎喜怒以回天意六月又上疏曰陛下下詔求言省  
刑獄然方求言而建言者輒斥方清獄而下獄者旋聞  
當此南北交訐奈何與市井細民申勃礮之談脩睚眦  
之隙乎時溫體仁方招奸人興東林復社之獄故道周

言及之晉左諭德掌司經局疏陳有三罪四恥七不如語遷少詹事侍經筵會鄭三俊下吏講官黃景昉救之道周上疏推獎旨下切責再疏以支飾譴道周前有疏纂述洪範月令等書未就乞寬假數月去有旨得卒業時楊嗣昌奪情入閣陳新甲奪情起宣大總督道周草疏分劾同日上之上持疏不下及召對與嗣昌爭辨上前犯顏諫諍不少退沮貶江西布政司都事未任巡撫解學龍以道周才堪輔導薦上怒疑為黨削籍逮治詞

連黃文煥陳天定董養河文震亨俱下詔獄戶部主事  
葉廷秀太學生涂仲吉先後疏救並杖戍道周繫獄時  
吏日奉紙筆乞書道周為書孝經百二十本在獄兩年  
感明夷事著易象正方草十二圖錦衣校徵急道周恬  
然謂曰俟吾畫一圖成就逮耳擁之去至北寺與仲吉  
廷秀對簿受械鞠時奸黨必欲殺道周尚書劉澤深等  
謂道周不宜以建言誅得遣戍廣西既而嗣昌敗周延  
儒蔣德璟乘間為上言得免戍復故官疏乞致仕歸講

學於邑之明誠堂及江東鄴山郡邑有司遠近鄉大夫  
士畢至凡一再會而燕都變作初道周末第時渡釣龍  
江舟覆溺焉恍惚見一人前導至一殿額曰倪黃館選  
時元璐名第一道周第二一死北都一死南都出處始  
終若前定然著述甚富奏疏經解詩文旁及天文厯數  
共四十餘種 二希堂集 行狀 通志 儒林錄

張蒼巒先生若化

張若化字雨玉號蒼巒世居漳浦之丹山弱冠師事黃

石齋得聞明誠之學旁及律厯經綸諸務靡不淹貫崇禎丙子舉於鄉兩上公車不第而弟若仲以庚辰捷南宮因留京師時石齋以言事下北寺獄若化青衣小帽雜廝役中時時進獄問起居左右之若化事父母以志養食貧茹苦嘗搗栢葉以代園蔬諸孫嘗之喀喀不得下咽若化茹而甘焉山居四十年足不及城市未嘗以姓名通有司勵志獨行不標講學之名疾惡守義凜不可犯雖骨肉至親不少假而惻隱所周悉力於人者不



少靳時值兵荒盜賊蜂起羣相戒曰慎勿犯張公廬鄉人依以避難終其身盜不入境丹山在羣山中巉巖阻絕日夕雲霧往來茅茨數椽上漏下濕豺虎交橫時曳杖孤往登陟羣峭徜徉泉石嘯歌自得人咸異之年六十六正襟危坐無疾而終子士楷能繼父志潛心性命之學稱儒宗焉

張次巒先生若仲

張若仲字聲玉號次巒生而韶秀讀書明理以不欺方

寸為本嘖笑不苟作止語默持之以敬若性成焉崇禎  
丙子與兄若化同舉於鄉庚辰成進士例選州牧性廉  
靜不願任煩劇改授益府長史居官清儉簡貴以禮匡  
宗藩請崇寬大戒嚴切不納以去就爭之益藩為之改  
容以母病乞休歸母沒既葬為土室處其傍聞狐兔嗥  
嘯輒泣下嗚嗚山居五十年清修獨善藝圃一區果蔬  
薯蕷度給賓祭餘悉種梅竹栽蒔灌溉身自為之時蓑  
箬牽犢飯隴畝與野夫雜處晚歲益務為敦篤飲人以

和遇鄉里有爭訟勸之以誠久而化焉邑濱海有蝗起  
羣飛蔽天觸禾稼草木葉噉盡民多聚泣或泥首禳之  
獨若仲所居數里內外無蝗患里賴以安歲丁卯秋夜  
風雨大作所居屋盡拔若仲獨寢地上無恙黎明人視  
之毛髮為悚年八十四以壽終鄉人稱若仲兄弟為丹  
山二先生而不名與兄若化同祀鄉賢

二希堂集

張端卿先生士楷

張士楷字端卿漳浦人父若化弱冠師事黃石齋先生

得聞明誠之學士楷幼穎異稍就外傳即學為詩歌古文詞超然獨往下筆立就弱冠一意屏棄舉子業潛心性命以主敬為根本嘗謂精一之學九思盡之作九思注錄太極圖說定性書西銘敬齋箴各為題詞參曲禮內則小學諸書為敬學科條務合天則而不苦於拘攣以授學者為言行準漳南學者爭師之其論經濟之本必在存養之熟從性命中起經濟還從經濟中求性命斯內聖外王之學也平生踐履純懿端重溫克望之如

泥塑接之和氣藹然而義之所在剛介不撓雖妻孥不以情恕千駟萬鍾不以易也自學道後益卑視文藝然文益深造詩直逼少陵凡天文地輿厯象律呂無不洞覽卒年四十有七論者以士楷方漢汝南黃憲憲好臧否人物時露圭角中涵養所得未知於楷何如也所著有濮沿山人集談學錄明儒林列傳土室庸言藝苑提宗靜學編等書

郡志

蔡時培先生春溶

賴繼瑾附

蔡春溶字時培龍溪人賴繼瑾字敬儒平和人二人者少倔强負志節全受業于黃道周之門道周器之

林子篤先生邁佳

林邁佳字子篤詔安人潛心力學從薛欽字黃石齋二先生遊著環中一貫圖說究論天人事物之蘊薛以一庵子呼之年八十餘猶與同志講易忘倦云

洪阿士先生思

洪思字阿士龍溪人年十三隨其父遊黃石齋之門容

止甚飭石齋器之及石齋出山思稍長乃自附於鄴山之徒日以詩歌自放末年憫其師文字散軼乃出收文于江上士大夫多重之其詩激楚清越不落時流作章草甚佳晚復入山而卒著有洪圖六經洪圖六史及敬身錄

郡志

陳祝皇先生天定

陳天定字祝皇龍溪人與文穆林公鉉為中表嘗師事之天啓五年成進士遭魏璫方張不釋褐而歸日與友

人談經史操時藝選政海內操觚家多宗之而陳氏說書尤盛行于世會漳中不靖二十四將躡海濱窺于郡郡守施邦曜與共商捍敵之策天定繕鄉兵輕衣治戎自城以東皆主之築土堡於鎮門兩岍以固郡圍賊嘗一夜以輕舟泊浦頭天定乘月黑要之賊幾不得出自是不得內犯歲復饑天定捐貲勸賑聚米分恤活饑民無數民為立碑紀其事崇禎辛未璫燄既熄始廷獻授官行人未幾林文穆卒遂請護喪以歸著有陳氏說書



及慧山詩文全集若干卷行于世學者稱為慧山先生  
郡志

涂德公先生仲吉

涂仲吉字德公鎮海涂一榛李子生而骯髒喜談節義  
時論未之許也稍長入太學聞時事闕失輒頓足或時  
為流涕一日在金陵聞黃石齋道周下詔獄時方飲投  
觴而起曰仲吉當一行為朝廷保正士遂間闕赴闕上  
書上覽疏大怒杖仲吉於長安門外復下錦衣獄鞠指

使者錦衣喬可用盛陳刑具仲吉曰吾閩南男子見義而動死即死耳寧足怖耶可用拶其指盡折仲吉不少挫既而懷宗亦稍悟乃與道周俱論戍未幾復赦還

郡志

### 紀石青先生許國

紀許國字石青同安後廩人與父文疇並受業於黃石齋先生石齋弟子數百人許國年最少許以掉臂獨行年二十二舉崇禎壬午鄉試

同安縣志

### 王載卿先生仍輅

王仍輅字載卿漳浦人少宰志道之孫從張端卿遊家  
既落恒敝衣冠有姑妻於貴人仍輅不往貴人餌以千  
金終不顧率妻子入珠溪萬山中暮年乃還於牆東舊  
址築數椽曰孤死首邱耳嘗置一笠為亭四面編蘆障  
之竟老其中

郡志

張紹和先生變

張燮字紹和廷榜之子萬厯甲午舉人聰明敏慧博極  
羣書結社芝山之麓與蔣孟育高克正林茂桂王志遠

鄭懷魁陳翼飛稱七才子與黃道周尤稱交好道周嘗云文章不如張燮一時遠近鉅公咸造廬式訪校書萬石山中刻有七十二家文選行世

郡志

范介卿先生方

范方字介卿同安人後遷漳之長泰天啓元年鄉試第一性耿介聯同志為社異趣者擯不入與銅山黃石齋道周浯州盧閑之若騰熊山沈復齋仝期尤以氣節相高期不負所學一試春官不第見逆閹濁亂時事日非

歸里閉戶却掃無復仕進意崇禎改元閹黨伏法乃更  
北上以石齋薦授國子監助教遷戶部主事晉員外郎  
流賊李自成陷京師方聞賊入整冠帶坐部署賊執之  
問倉鑰誰掌曰我掌匙安在曰頭可斷匙不可得也遂  
抗賊不屈死之其子登楓同之弟子員甫冠婚自家來  
省適值難方揮之不去殮方畢號痛出血數升絕吭於  
其旁有老僕為藁葬於都城同安義塋登楓附焉

清漳何氏家世學派

考何公經學樸茂先正皆推重無異詞其書誠足為  
後學指南今撮其畧著于篇為何氏家學云

何玄子先生楷

何楷字玄子漳浦鎮海衛人生有異質書過目不忘天  
啟五年登進士時魏璫肆毒朝紳楷不謁選而歸崇禎  
時起戶部主事權許墅關事竣進員外郎七年詔簡部  
曹為言官大臣多推楷改刑科給事中流寇陷鳳陽燬  
皇陵楷疏劾撫臣楊一鵬按臣吳振纓下獄語侵輔臣

溫體仁王應熊旋復劾兩人朋比行私言振纓為體仁私人一鵬為應熊座主情面重則祖宗之陵寢為輕朋比濃則天下之刺譏不恤語甚切至忤旨鐫一級復疏請罷內操上又不從是時上憤在廷之臣多貪庸顧身家視君國輒泄泄思欲痛整齊之于是詔獄繁多司寇諸曹郎日不暇給有言者上疑為偏護舉朝皆結舌無敢言楷乃疏陳慎刑八議媿媿千言援祖制明國典寄匡救于將順之中天子知其諷切也一時獄稍寬楷自

以身為言官不得默朝廷每有大事時政有得失嘗侃侃敷陳議保舉言擇相請停秋決及言海寇宜勦併駁諸大臣情弊即皇陵一案楷已得罪尤復再申前說謂二輔輕視祖宗勇護私黨政本何地相率為比尤而效之弊將何極及應熊陳辨楷復駁其明旨未下應熊何知置辨必有往來偵探漏禁中語者應熊竟由此罷去蓋天子亦知其敢言雖不能悉從然顧心志之未幾改工科都給事中時火星逆行天子減膳脩省兵部尚書



楊嗣昌方主款因歷引前史惑帝意楷疏駁其立言本  
心附會罔上及嗣昌奪情柄政楷又疏劾其非忤旨貶  
二秩為南京國子監丞旋丁內艱乃歸講學于紫芝書  
院服闋諸大臣請復原官上不許既而國用匱乏朝廷  
思用鈔乃召楷問鈔法至南都而京城已陷矣楷博綜  
羣書寒暑不輟尤邃于經所輯古周易訂詁詩世本古義  
最精博春秋繹尚少四公然皆為學者所傳云

郡志

閩中理學淵源考卷八十三

欽定四庫全書

史部

閩中理學淵源考卷

八十四至  
九十二

詳校官編修

臣

謝振定

刑部郎中

臣

許兆椿覆勘

總校官原任中允

臣王燕緒

校對官中書

臣王鍾泰

謄錄監生

臣趙希濬

欽定四庫全書

閩中理學淵源考卷八十四

廣平府知府李清馥撰

延平明代諸先生學派

延津為楊羅李朱四賢授受講學之區其山川清峭  
秀蔚仰止者不啻閩邦之岱嶽矣明代希風往哲者  
如王希白田希古游行簡廬叔忠田德萬諸先生其  
學術仕跡卓然可考固皆昔時之流風餘緒也今錄

其著者載於編

編脩王希白先生暹

王暹字希白將樂人洪武丙子舉人永樂中以薦入京  
修五經大全由興安訓導歷官國子助教學士飭脩祭  
酒而下咸推重之終翰林院編脩著聲律發蒙解註

道南源委 閩書

副使田希古先生頊

田頊字希古大田人為文簡奧初領鄉薦計偕不赴讀

書拒麓後登正德辛巳進士歷官禮部郎中與張治具  
廖道南王用賓鄭善夫輩以文章相砥及督學湖廣闢  
濂溪書院規飭諸生先行後文相與講明性命經濟之  
學所識拔多為名雋遷貴州副使以母年老力疏乞養  
時年方四十餘而已撫按交薦五上不起母年九十七  
終頃攀號擗踊有如孺慕家居三十年絕跡城府流賊  
犯境頃出私貲募死士環守賊因以遁邑人德之

閩書

道南源委

教諭吳敬昭先生恭

吳恭字敬昭南平人選為翰林庶吉士與纂脩宣宗實錄以疾告歸久而踰年部文督責有司促行勉強赴部願就教職授餘干諭致仕卒恭篤志向學淡於世務天性孝友家業悉讓二兄有學古文集

閩書

教授樂廷冠先生文解

樂文解字廷冠沙縣人少好學精詣窮理沈思忘日夜以貢授吉安訓導從羅文恭洪先講學洪先與語忻然

曰吾老友也檄署廬陵歲值饑著救荒解上當道行之  
邑賴不困擢鳳陽縣教諭雷州教授謝病歸日與其從  
兄應奎酬和以老

閩書

樂先生如璋

樂如璋沙縣廩生提躬正大以禮義自持篤嗜羣書垂訓  
後學弟子半出其門有四書翼經說行世

延平郡志

侍郎游行簡先生居敬

子於廣

游居敬字行簡南平人嘉靖十一年進士選翰林院庶

吉士改授監察御史以澄清自任巡視蘆溝按商人匿  
稅語侵司農竦然憚之巡按應天劾偽學之聚徒游談  
騷擾驛傳者捕奸黨王冠寘之法出徽州民久滯疑獄  
劾池州守之倚相勢為墨寇者出為浙江按察僉事覈  
吏治畫民便利禁湖游戢戒壇杭俗為一變擢廣東按  
察副使湖廣布政叅政仍按察浙江累官左右布政使  
丁內艱復補浙時倭賊猖獗征調主客兵以數萬計旁  
午倉卒庫無羨贏百凡皆倚辦居敬居敬處畫無遺一



日議者欲練土著汰客兵當闕而噪督撫沮喪莫為計  
居敬挺身前諭數語皆解散丁外艱復補山東晉都察  
院副都御史巡撫雲南鎮守沐朝弼故恣橫居敬以分  
義裁之歸其所侵騰越州莊田東川蠻酋阿堂謀篡東  
川強奪府印擅立作亂奔烏撒致與宣慰安萬銓雷益  
州土官安九鼎治兵相攻十餘年不解矣至是復侵及  
羅雄州逼危會城居敬上疏請川貴兵聯誅之有旨令  
川貴撫按勘明具奏聞相視莫敢先發居敬又屢招阿

堂不服乃出不意督土漢兵進勦阿堂窘急自刎死三省遂定而沐朝弼故銜居敬裁抑之言於巡按御史王太任以討堂奉朝命會勘奈何不俟勘得旨擅興兵者大任遂疏劾居敬坐逮杖繫論戍碣石而前功盡抑穆宗即位赦歸廷臣交章訟居敬召起南刑部右侍郎尋轉左高新鄭再相欲甘心徐華亭無上事請考察科道官凡見彈劾者一網去之居敬語其所善同官曰君相必不忘華亭暨所嘗牴牾此斤斤耳僕謂君相姑舍是

而一心謀宗社異日誦相業孰光大者新鄭聞之恚甚  
示意於其門生其門生以老論居敬居敬方為三疏上  
之其一言中貴擅權其一言時宰作威福其一請其鄉  
之羅豫章李延平從祀孔廟而先上從祀奏新鄭以中  
旨摘其奏詞繁稱罰俸三月而居敬遂乞歸越四月卒  
朝廷遣官諭祭營葬如故事居敬學務實踐身甘茹苦  
衣粗食糲一席十年漆枕櫛匣尚青衿時物宦途垂四  
十年諸子僅給衣食鄉評重之其峻德宏猷古風直節

一時鮮儷所著有五經旁註可齋文集及延平郡志奏議若干卷子於北於廣居敬滇南被逮時廣方登十六力辨父寃既長從三山王應鍾講學後以太學蔭授太僕累官戶部郎卒於官

鄭先生文端

鄭文端永安人幼鬻魚鹽行年三十盡棄所事從師為學精於易生徒日衆永安易學自端啟之

通志

趙雪航先生弼

趙弼字輔之南平人博學多識清潔自好遠於易教授鄉邑學者稱為雪航先生所著有雪航膚見等集今通鑑內雪航趙氏史評即其人也

延平郡志

縣令朱希純先生成文

朱成文字希純南平人嘉靖壬子舉人知於潛嚴禦礦寇時與田一菴王龍溪錢緒山會講天真書院究心理學著讀書會要越閩議略天目劍津會語鐘臺問答續壤瑣吟藝林枝語等集

閩書

教授林茂實先生應芳

林應芳字茂實南平人弱冠扶父柩楚南颶風忽作抱棺溺湖水中俄觸沙畔得留歸葬如禮錄選貢訓溫州遷吉安教諭南安教授解綬歸入仕家居惟以講明道學為已任

閩書

施先生明

施明南平人家貧苦學六經子史悉能通解徐文貞司理于延期以大器領教南康士慶得師及歸後進景從

鄉評高尚

閩書

縣令徐時傑先生登第

徐登第字時傑南平人以歲薦授學博教士以身心性  
命之學部使者首薦之擢令容縣清守直行竟掛冠歸

閩書

教授官思敬先生寅

官寅字思敬順昌人嘉靖間應府庠貢天性孝友以道  
學為己任歷嘉興教授所至教澤及人跡平湖篆清介

不染及歸杜門課子立祭田睦宗族

閩書

同知盧叔忠先生應瑜

盧應瑜字叔忠順昌人隆慶丁卯舉人知遂溪縣遷潮州同知治河有功掛冠歸養著書闡明格致一貫中和夜氣之旨

道南源委

教諭蕭賓竹先生來鳳

蕭來鳳字舜儀號賓竹將樂人力學甘貧事李材與語多所契合退謂人曰將樂有舜儀身體力行似可入龜



山門者由貢諭饒平學者稱為賓竹先生著有演宗問答雅歌集

尚書田德萬先生一雋

田一雋字德萬大田人隆慶戊辰舉南宮第一選庶吉士讀中秘書遜心經濟雅以大節自砥庚午授編脩尋奉使淮藩不受藩王餽復命充經筵起居官修累朝實錄旋陞修撰晉侍讀萬厯丁丑張江陵相奪情輒假旨杖諫者箝制天下同舍郎趙用賢吳中行二公與焉一

僞亟與趙公志臯謀抗疏論救時王公錫爵視院篆則相戒毋累聖德姑過張所諷勸之於是王公偕志臯及一僞張公位習公孔教詣張所首為杖者解張默不應則奮氣昌言備責以綱常之義且曰天地鬼神其可欺乎天下萬世之口可盡箝乎語峻直甚張憤慙無地顧左右欲引佩刀自裁一僞與諸公大笑拂衣出張大恨於是志臯孔教被逐而一僞與王公錫爵先期告歸亡何張敗起故官同修大明會典然終非所樂數月復引

疾歸久之起家以宮寮視留篆攝司成事居二年召修  
玉牒已擢國子監祭酒飭規條絕貴近闕說其序次出  
入一無所假有一生持刺求進越一偶故召試抑奪之  
生驚甚寓言譏訕一偶曰吾抗顏為弟子師當為生徒  
湔滌儻蕩狀疏上于朝斥為編氓諸士始逡巡開軌已  
丑擢禮部右侍郎兼侍讀學士旋轉左教習庶吉士諄  
切不倦時與講求經濟與立朝大節無不人人顧化者  
以病請未發卒邸舍詔贈尚書諭祭給郵予葬費一

雋恬淡寡慕居恒辨一介然不欲以潔自標歷宦廿餘載莫知其貧迨病篤諸門人更直侍卧榻睹所食用率粗糲疏布夫然後知其蕭然寒士也

貢士林良章先生鈿

賴汝允

何昇

林鈿字良章將樂人萬厯間貢士時宋儒羅豫章李延平二先生未與從祀鈿請於督學熊公尚文行之復刊楊龜山全集著有澹寧集行世時有賴汝允者亦請羅李從祀而龜山先生之祀則自何昇請之何賴二公皆

鈿同郡人也

道南源委

董先生台庸

董台庸將樂庠生學有心得為先正典型常為其邑令  
傳宗臯致敬遊李見羅之門歸而與父紹幃先後著禮  
記說約

延平郡志

學正張先生居靜體中

張體中字居靜南平人性簡淡洽經史繇歲貢仕香山  
宣城福寧學正學博行端諸生執經問難者咸與闡明

宗旨及歸蕭然槃澗杜門著述有經講意詩集等刻藏

於家

郡志

祝先生允文

祝允文將樂人少業成均數載試輒冠軍積分候選性恬逸不仕好學力行行坐終食口不輟誦老尤篤記詩文居家正冠修儀不妄與人交紛囂不入于耳送客不出戶外而禮意誠慤雖隣人數歲罕見其面者人以擬之宋陳布衣

郡志

貢士黃本正先生炳如

黃炳如號本正南平人淳篤好學品行卓然守父庭訓

孺慕不忘膺歲薦究程朱之學人士奉為師表

郡志

鄧仲昭先生斯薦

鄧斯薦字仲昭沙縣人年十五補弟子員篤志好學慨然以明道自任邑侯方公延以西席未嘗以私干家徒四壁常自怡然有懸鶉樂道風子可權登乙未進士

郡志

閩中理學淵源考卷八十四



欽定四庫全書

閩中理學淵源考卷八十五

廣平府知府李清馥撰

建寧明初諸先生學派

按余則亮杜德基丘永錫鄒季和張孟方諸公皆淵源建安之學託志在巖穴山谷惟時武夷雲谷間學侶尚有其人故繫心者嚮往焉非欲戢影寂寞之濱也惜年代寔遠師友莫詳矣黃氏仁溯金華宋氏之

傳黃氏福楊氏壽夫李氏鐸各以治經砥行名著廟廊皆建安先正之遺範也茲採其著者載于篇

知事余孝友先生應

余應字則亮政和人早從江惟志游以私淑文公之學性凝重寡言笑恒以禮自律家邇闕閭足跡未嘗入縣門早失所恃事繼母與處繼弟以孝友稱洪武初以明經薦起為儒學訓導遷留守司知事越三載坐公文不式免歸執父喪一遵文公家禮邑人稱曰孝友先生

閩雜

源流

閩書

司訓鄒季和先生文慧

鄒文慧字季和建安人任司訓元末謝職服柴桑巾服與門徒講程朱之學洪武初本郡理學推文慧為首

閩書

道南源委 通志

贊禮郎黃淵靜先生仁

黃仁字淵靜建安人曾祖定宋末居六合為兵馬副都監仁溫純能詞章少時朝出受易於部使陳孟然暮抵

舍質疑於仲父居德內外皆得師學日進如雲集水湧  
洪武辛亥有司以仁名上福建行中書省試藝棘闈主  
文衡者為前進士林以順吳尚志江惟志郭麟取舍甚  
嚴及出榜選中三十人仁居第四年始弱齡耳明年會  
試南宮銓曹急用材不俟再試擢奉常贊禮郎仁初名  
文仁有司以犯周西伯謚加水其左曰汶仁及解名中  
書右丞相汪廣洋曰仁義甚弘可冠以汶乎第為名仁  
仁受學宋文憲濂濂甚愛之為作黃淵靜字辭而仁仲

父居德者亦奇男子年十六時中程試高等諸老生不  
中譯於庭居德請面試譯者持筆不能下面頸發赤出  
後改名保元為酆都丞

閩書

教授杜德基先生圻

杜圻字德基崇安人元杜本之孫苦學砥行以先哲為  
師洪武間以薦舉授甌寧訓導轉温州教授

閩書

教授丘永錫先生錫

丘錫字永錫崇安人領洪武鄉薦除工科給事自陳願

學職改衡州教授永樂四年預修大典改衡州教授宣德七年後預修太宗實錄成仍乞原職改建昌教授自筮仕以來凡五典文衡人服其公性嗜學垂老不倦偕其友徐仲禮結社武夷手不輟披卒年八十有文集行世

閩書

武夷山志

訓導張孟方先生矩

張矩字孟方廣陵人父伯巖元季為崇安五夫巡檢遂卜居焉依屏山劉氏得其遺書讀之遂通五經諸禮書

皆精絕洪武間薦為崇安學訓導

通志

寺丞黃汝錫先生福

黃福字汝錫浦城人博通經史任杭州府訓導勤教善誘  
陞太常博士永樂中預修五經四書大全及性理大全  
書陞本寺寺丞

閩書

修撰楊先生壽夫

楊壽夫建安人父文叔元末與兄恭叔舉浙江鄉試恭  
叔洪武年薦甌寧訓導改建安壽夫名松以字行通春

秋孝友篤摯建文辛巳郡守芮麟薦授縣學訓導秩滿諸生請留陞本學教諭歷二十餘年多所造就典考鄉試者五會試者二宣德中楊文貞輩交薦之陞翰林院編修預修宣廟實錄陞修撰正統中致仕

閩書

李先生鐸

李鐸甌寧人涉獵五經尤邃于易洪武中以明經薦授監利教諭為文一主傳註不尚穿鑿誘掖為多

閩書

簡討蘇伯厚先生庠



蘇伯厚名庠以字行政和人父照伯厚自幼以聰敏聞  
比長博通經史尤精毛詩為文章援筆立就聲譽日起  
每自沉晦篤意事親講學絕跡不至城府以孝行見重  
累薦不起洪武乙丑以明經授建寧訓導後學多所造  
就陞晉府伴讀未赴永樂初預修太祖實錄遷翰林侍  
書復預修永樂大典為總裁陞簡討兩典春闈文衡進  
講東宮卒伯厚學本誠實議論皆有根據在翰林幾十  
年絕無私謁與禮部尚書鄭公賜有師友之舊未嘗一

至其門鄭公嘗請見必規以正言每加敬服其餘出其門者咸操守有品人有一善稱之不絕口對同寮詞氣溫和平失色于人家庭有禮法服用儉約自號素履有素履集子鑑永樂間官稽勲郎中弟仲簡

閩書人物考分省

訓導蘇仲簡先生鏡

蘇仲簡名鏡以字行善文詞與兄伯厚弟叔敬季雅自相講授洪武初以明經薦授崇安學訓導

閩書

州判盧士明先生欽

盧欽字士明建陽人性好學五經百氏悉能貫解曰讀書非徒記誦將以行之也洪武以明經聘為儋州判卒

閩書

助教趙志道先生友士學派

明代建安師席有立者湮晦莫詳只趙志道先生傳中載鄭文安楊文敏二公曾游其門其餘有道前修求師訪友皆散見列郡及他邦皆可考焉

助教趙志道先生友士

趙友士字志道甌寧人宋宗室裔純厚樂易洪武初以明經舉為府學訓導正己率下鄭文安賜楊文敏榮皆出其門官國子助教有文集行世

閩書

通志

文安鄭彥嘉先生賜

鄭賜字彥嘉政和人舉洪武十八年進士授監察御史時天下初定法令嚴肅郡邑吏坐罪逮繫者多既解戍命賜就龍江編次其行伍時暑甚賜諭以上恩慰撫之脫其鉗械俾各就居止旦一詣視有疾病羸弱者捐祿

米饘粥之皆感悅湖廣布政司奏缺官賜秩滿遂與簡  
討吳文並出為叅議二人同德協力剔弊去蠹清簡寬  
直最為知名丁內艱服除改北平布政司左叅議成祖  
在藩賜服事甚謹被眷愛而謀國者疑之謫置安東屯  
未幾召為工部尚書既命督軍務河南拒靖難師成祖  
即位李景隆言賜罪亞齊黃逮至上問吾何如待汝遂  
相背耶賜曰亦盡臣職耳上笑釋之改刑部尚書復轉  
禮部寵遇日隆後衰病不任官冗為侍郎趙珰所間益

惶悸周章上心輕之頃之卒上問翰林臣曰賜不病遽死自盡耶楊士奇對曰病矣惶悸不敢就醫藥昨在右順城門外立而仆臣命其屬掖出之語未竟上曰賜故君子才不贍耳其撰文遣祭翰林諸臣退上獨召士奇曰微汝言吾幾疑之遂贈太子少師謚文安賜小心恭慎易直和厚學士解縉嘗於上前稱其足為君子

閱書

文敏楊勉仁先生榮

楊榮本名子榮字勉仁建安人漢太尉後也祖達卿有

陰德

達卿值歲儉出積粟食人使為種樹於其縣之龍津名子弟戒之曰樹長勿以售人惟學舍杠梁浮

屠老子之宮貧無室廬死無棺槨者則予之否非賢子孫繇是鄉人獲濟者衆元福建行省左丞阮德柔作萬

木圖

以

子榮登省試第一建文二年進士授翰林編修

永樂初與解縉楊士奇胡廣黃淮胡儼金幼孜被選入  
文淵閣付之密務而兩制悉歸焉內閣典機自子榮始  
時靖難之初朝政鞅掌子榮年最少而最警敏通練一  
日寧夏報被圍上召七臣獨子榮在示之奏而曰爾後  
進也寧解此何以禦之子榮對曰聞寧夏城堅士卒習

戰勅守臣隄備可耳夜半聞圍解旦召曰何善料也因  
獨名榮陞修撰仁宗立為皇太子以侍講進奉訓大夫  
右春坊右諭德兼侍講如故五年命視邊甘肅還奏稱  
旨上手剖瓜賜之明年以父喪給傳歸既葬起復視事  
明年母喪乞歸上以北行期迫不許明年榮與學士胡  
廣諭德金幼孜皆扈從八年從征至凌霄峰與廣幼孜  
及刑部侍郎金純夜失道幼孜墜馬廣純不顧去榮下  
馬為理鞍轡前後墜讓以所乘馬午見上時上遣人四



索三學士及見大喜問故笑語幼孜曰此中多狼爾非  
楊榮詎能免乎榮謝曰僚友當然上曰胡廣金純獨非  
僚友耶使掌護衛勇士三百不隸于諸將賜駕前先鋒  
銀牌榮還京請終制賜金幣馳驛勅中官護行趣歸既  
至復榮官已侍諸皇孫讀書文華殿講授有程度皇太  
子稱之明年復與廣幼孜從北巡太孫侍行上命榮以  
間陳說經史兼領尚寶事凡宣詔出令及旗志符驗必  
得榮奏乃發比還北京命修五經四書性理大全書成

宴勞之留北京二年進翰林學士仍兼庶子從還京師  
明年復從北巡十八年進文淵閣大學士兼翰林院學  
士明年定都北京營建規制多出於榮會三殿灾榮直  
入麾衛士遷御書圖籍翌日上喜褒賜之榮因與幼孜  
陳便宜十事報可榮論事激發不能容人過然羣臣或  
觸帝怒致不測輒從旁寬譬之侍讀李時勉尚書夏原  
吉皆以榮言得無死都御史劉觀以榮言得無戍邊營  
善採人主意談言微中以故其說得行嘗謂人曰事君

有禮進諫有方為人臣以抗直賈禍吾不為也明年復  
從出塞軍事大小令叅決賚予優渥師還榮與幼孜皆  
受上賞明年從征西駐萬全軍務悉委榮晝夜見無時  
上時稱揚學士不名額森托噶款塞羣臣議莫定榮獨  
請往受降而歸師旋明年復北征當是時上凡五出塞  
榮幼孜輒從周旋險阻未嘗頃刻離大軍抵達蘭河敵  
遠遁師亦獎上問羣臣當復前否羣臣唯唯惟榮與幼  
孜獨請班師上許之時浙江守臣言浙麗水與閩政和

山賊熾請發兵榮曰愚民苦有司不得已相聚兵出怕  
益聚不可解遣一介往撫可不煩兵如其言盜果息上  
御帳殿從容語榮幼孜曰東宮監國久明習政務今歸  
當付以國事朕將老焉二人頓首還次榆木川上崩中  
官莫知所措榮與幼孜入御幄議喪事二人議六師在  
外去京師尚遠秘不發喪以禮斂龍輿所至朝夕進膳  
如常儀益嚴軍令人莫測或請因他事為勅遣人馳報  
太子榮曰皇帝大行孰敢稱勅莫若具啓人皆避之仁

宗即位進嘉議大夫太常寺卿兼前職有間進太子少  
傅兼謹身殿大學士尋勅賜繩愆糾繆之章始大行計  
至仁宗哀亂不及詳問當時事痛定乃知賜勅曰先帝  
崩祖六軍在外卿盡忠謀鎮定果斷加賜白金五十兩  
綵幣十表裡寶鈔二萬貫白米二十石特陞工部尚書  
前官如故其冬勅護葬山陵勅修太宗實錄命榮總裁  
仁宗崩宣宗即位復命總裁仁宗實錄益推心委任榮  
與楊士奇楊溥協恭輔政天下稱為三楊士奇曰西楊

溥曰南楊榮曰東楊而果斷之才卒歸榮也宣宗親征漢庶人棄交趾之議皆自榮發之二年賜勅并銀章五褒予甚至宣德三年上北征出喜峰口榮與楊溥皆從大獲而還榮獻詩十章又明年兩朝實錄成宴勞有加尋進少傅食三祿如故辭大學士祿允之有頃誥贈三代滿三載賜勅諭宣宗崩英宗即位委寄如舊賜予相屬五年乞歸展墓上使中涓輔行還至武林驛而卒年七十上輟朝一日贈太師謚文敏授世都指揮使榮歷

事四朝謀而能斷中官持文書至閣必問東楊在否不在即去嘗會廷臣錄囚片言立決衆皆歎服尤喜賓客善交際雖貴盛無厓岸士多歸心嘗疏舉陳循高穀苗衷三人自代或謂榮處國家大事隨機應變不媿唐姚崇而不拘小節亦頗類之正統初天下休息榮有力焉榮少從師友慨然有志古名相嘗退朝意甚不樂子讓請曰大人得毋以不肖有所累乎榮曰非也念吾職重無以報國三代以上之大臣無不怠惰荒寧為懼所以

憂戚不在汝輩曾孫旦官吏部尚書

尚書楊晉叔先生旦

楊旦字晉叔榮曾孫弘治庚戌進士歷吏部考功郎中嘗考察京職有被黜而賁緣奏辨奉旨再覈馬文升倉卒欲改擬旦曰祖宗來未有此例倖門一開後將謂何竟覆罷陞太常少卿歸省還朝中官劉瑾欲要見不得遂以違限出知溫州提督浙江學政瑾誅陞順天府尹時武宗未建皇儲與九卿具疏請擇宗室之賢者育于



宮中尋奉勅總督京通等倉適回賊犯邊甘肅驛騷奉  
勅督理糧餉陞總督兩廣軍務兼巡撫番禺清遠河源  
等縣蘇岡十八山滴水巖等塞猺獞負固旦調集官軍  
土兵分道並擊斬級萬一千有奇俘獲四千一百有奇  
奪回被掠男女二百三十餘人牛馬輜重不可勝紀璽  
書褒異以母喪奔歸嘉靖初起掌南院陞南吏部尚書  
旋改北會桂萼張孚敬以中旨陞學士旦率都院疏論  
忤旨遂為陳洸所誣有旨令致仕科道交章論薦不報

旦奉母至孝雖貴顯不衰年七十一危坐而逝

通志

閩中理學淵源考卷八十五

欽定四庫全書

閩中理學淵源考卷八十六

廣平府知府李清馥撰

成化以後諸先生學派

按熊氏熙為勿軒先生之裔少從三山林氏珙學易  
與虛齋蔡氏同稱高弟若趙蘭溪旻楊天游應詒楊  
文銳鏹黃元泰三陽傳稱其授徒傳業一時師席而  
門徒莫考矣其餘諸賢或以經術文學著稱或以功

績節概垂名皆表表可傳述者嘗考建安風氣宋時  
開倡首於八閩自游胡朱蔡真熊數家以來遞衍宗  
風中明以後人才稍替矣然其流風篤厚大抵質有  
餘而文少遜其守儒服躋顯仕者規矩不踰豈非大  
賢之烈哉

訓導熊文明先生熙

熊熙字文明建陽人弘治壬子鄉貢士宋勿軒裔孫少  
從侯官林先生珙學易與晉江蔡虛齋先生同稱高弟

授翁源訓導後謝病歸門人感泣道左所著有四書周

易管見

閩書

副使張搏南先生鵬

張鵬字搏南浦城人正德辛未進士授戶部主事督馬  
廠劾中璫私貸影射之弊衆側目擠陷賴揚一清石琚  
保持之武廟東巡鵬具疏諫止轉本部郎乞歸養嘉靖  
初起用補兵部郎陞廣東按察副使監司欲以賄脫二  
重獄堅執不從自免歸年八十卒鵬博覽羣書尤精理

學後祀鄉賢

教諭趙蘭溪先生旻

趙旻政和人嘉靖中以歲貢任高安訓導繼擢蘭溪教諭續以年老解組諸生詣學使阮鶚保留鶚曰師德感人如此耶遂改行祠為書院留講學三載乃歸歸則入受業于湛文簡又二年擴明道學後進從遊甚衆嘉靖

壬戌遭倭厲聲罵賊不絕聲

閩書

舉人楊天游先生應詔

楊應詔字邦彥建安人嘗讀書武夷天游峰因號天游山人少時從其祖松宦學祖試叩所欲為應詔言欲盡讀天下好書幹盡天下好事做盡天下好人年二十游庠序謁朱文公祠仰而嘆曰他日不俎豆是非夫也年三十一舉于鄉十上春官不第其時上春官時崑崙山人張詩者見其文稱為司馬子長李太白復生應詔不屑也久之遍遊趙齊魯間卒業南雍得奉常呂涇野柁之學喜其淵源有本遂師事之歸而勅道宗堂華陽山

奉祀孔聖并顏曾思孟周程張朱諸賢及涇野其中揭  
涇野所嘗著教壁間日與叅對年友溫陵蔡元偉亦潛  
心斯道者遂自泉往建相聚砥磨而他諸名公若鄒東  
廓守益王龍溪畿唐荆川順之魏莊渠校章介菴袞或  
見而心合或聞而神往也應詔之學以寡慾正心為立  
本以不愧天為歸的於古今壯猷奇烈忠義慷慨之事  
峻嶒激發夢寐見之雖沉潛深靜之意少而心懷軒豁  
殆亦聖門之為狂者所著有閩學源流及困學二錄又



有五經辨疑四書要義以發聖賢之旨有衛道錄以闢  
禪有日史以自記子德輿睦州司訓有士行

按明儒學  
案傳後載

有楊天  
游集  
閩書

文憲李時言先生默

李默字時言甌寧人正德十六年進士選翰林庶吉士  
明年嘉靖改元修迎立功欲倣成祖封尚書茹瑞故事  
擬執政封爵默上執政書規之改戶部主事陞兵部員  
外郎差閱大同軍士戰馬鎮卒素剽悍動輒嘯呼胡侍

郎瓚銜命赴鎮經畧措置乖方卒復譁默抗疏請亟易  
帥變遂定調入吏部文選陞驗封郎中議復開國勲臣  
誠意伯暨常李湯鄧四氏爵蔭真人邵元和以符術方  
貴幸請封誥默奏勿予朝論避之兩與文武會試得薦  
守禮陸炳等多知名士當武試畢時就兵部宴因辨論  
賓禮位次忤兵部尚書王憲憲疏劾默坐謫寧國府通  
判默雖坐謫顧世宗心是默所持以此注識之矣默判  
寧國周咨隱痒陶範髦俊纂修郡乘建靖難死亡陳尚

書祠精心受事不厭薄官守陞廣東僉事主屯鹽二政  
陞雲南副使督學政首經術宗行誼購遺書廣厲學官  
表賢者墓窮荒僻遠文學嚮風歷浙江叅政按察使左  
右布政大都端毅廉直所至有聲久之大臣以公輔器  
薦起太常卿掌南京國子監祭酒事博士等官得備臺  
諫選自默發之陞禮部右侍郎改吏部右侍郎尋轉左  
庚戌秋燕京戒嚴默奉旨守正陽門調營兵五千畫守  
甚設而奏令開門無困居人敵尋引去陞吏部尚書制

冢宰非部長卿有殊望者弗與世宗知默特以卿貳陟  
異數也嚴嵩當事前此吏部率以疑事嘗嵩嵩得從  
容持之默處置堅決莫能短長奏輒報可無有留端為  
嵩地者遂與嵩卻久之遼東巡撫缺默推張布政臬臬  
雖嵩鄉人而素疎上偶問嵩嵩遂力言不任上怒而先  
是咸寧侯鸞以干請不售為密書疑上上遂罷默默歸  
明年鸞以逆誅會吏部尚書員缺御批特令默復職召  
直無逸殿許乘馬禁中眷注益隆未幾加太子少保復

兼翰林學士方有爰立之命相嵩每阻其進客有諷明哲自保者默嘆曰吾備位公卿年幾六十尚復何求惟有致身耳屬歲大計戒門下毋入一賓客即同直大臣亦浹月不相往來相嵩無所得為人地以此滋不悅而先是嵩子世蕃規機利多請託侵官陰執國政默微諷嵩曰公身許國久墳墓濡降當在夢寐曷不令嗣君一掃展嵩曰然吾將念之久之不遣復為請嵩曰孰令我一子而不長侍膝下乎君數請去何言之亟也默曰外言

籍籍宜暫行以息之嵩忿然作色於是怨默益深會工部侍郎趙文華當浙直禦寇欲攘功請視師及還報自施勞伐謂本兵在掌握默不為引大失望乃撫部試策題為謗訕而嵩主之誣奏下獄論死始張經赴西市默頓足嘆人有先告嵩矣又數數於公卿間摧折文華過當至是兩人引繩批根以償其所交惡夙憾默既得罪踰年從獄中再上書世宗注覽久之縉紳大夫咸知天威漸霽冀其復用而默溘然卒矣隆慶改元南吏科給

事中岑用賓等為默訟寃詔復太子少保吏部尚書兼翰林學士遣官祭葬萬厯十三年追贈太子太保諡文愍錄其孫銓為國子生默博學任節矜蹕奮激言論截烈屢蹈危機骭髀自如至于擘畫經濟揚摧風雅疊疊乎星貫川沛發為文章淵宏俊達有秦漢之風所著有羣玉樓稿孤樹哀談建安人物傳朱子年譜諸書皆傳

于世

明史 閩書

訓導楊孟岳先生松

楊松字孟岳甌寧人正德中貢士授廣州府訓導作人  
育才時時以禮教諸生學士黃佐為諸生時貧甚松却  
其贄重遺贈之佐父善星厯人多奇中而松謂之曰子  
占人多中余以文占汝子亦奇中如子矣佐果以其年  
魁多士松以母喪歸貧甚莫自存也乃時時自謂宇宙道  
義場中不曾饑餓倒人服闋復授廣之香山香山僻在  
海隅士習樂游衍耽聲利松時時謂之曰陳公甫非汝  
隣邑偉儒乎彼以一孝廉倡道白沙崛起南服至今江



門烟水白龍池之風月揭揭如在同時握鼎鼐持衡樞  
者今安在也而況如諸生者樂游衍耽聲利哉諸生聞  
言咸躍然感奮卒于官

閩書

徐尚德先生驥

徐驥字尚德浦城人性恬靜日以經史自娛所著有洪  
範解訂正及皇華詩一卷

通志

縣令朱孔溫先生煊

朱煊字孔溫文公十世孫少警穎讀書日記數千餘言

舉鄉試非公事不履邑門令薛宗鎧嘆曰朱孔溫真儒  
裔也嘉靖初授江西永豐令永豐俗獷狠囂訟煇一鎮  
以靜間有犯者必懲而婉諭之秩滿乞致仕囊無餘金  
居家操行醇謹子姓侍立衣冠肅然

推官林子順先生命

林命字子順建安人嘉靖癸丑進士令溧陽金壇有聲  
擢諫垣首疏議革冗官復條閩中致寇六事得借留都  
積帑及閩中屯鹽之賦肆拾萬餘以充軍餉出參楚藩

晉廣東廉訪尋有忌者左遷金華推官量移南部遂解組歸命裋身高潔居常撮集古人嘉言懿行為正氣錄自警歷官十餘年一秉清白而憂國公忠議論封駁不以詞色假人遇公正輒發憤所著有正氣錄十卷春秋訂疑十二卷陽溪堂集十六卷

閩書

侍郎騰汝載先生伯輪

騰伯輪字汝載甌寧人令番禺以德禮道民若嚴師在上不敢一日遊蕩而嬉會兵鼎沸擊太守門諸司捷戶

避之伯輪出乃不至亂入為吏部郎出督學兩浙聲教  
整嚴所掄錄號得人歷廣東按察使布政使粵人葉春  
及以儼之先輩仕粵者莆田彭公韶臨海陳公選華容  
劉公大夏蒼梧吳公廷舉擢都御史操江南京條上江  
防八事督撫浙江值歲凶開倉煮粥令材官四出告糴  
芻粟廣至力疏請改折漕綱停減織造並見報可颶風  
起海鹽防海塘堤震壞設方畧發帑脩築春汛海上忽  
島夷集數餘艘將入犯急率諸將擊之捕首虜百事聞

恩賚有差頃之遘疾卒訃聞贈兵部左侍郎蔭一子諭

祭葬

閩書

主事吳公度先生立

吳中立字公度浦城人舉隆慶辛未進士疏乞歸養  
父沒服闋遂絕意仕進以著述為事結廬武夷山中十  
有七年越中太史張元忭入山訪之微諷以仕則曰士  
各有志萬厯十五年南禮部尚書袁洪愈給事中周邦  
傑巡按御史楊四知表其脩節詔府縣起送赴部辭乞

終隱貽相臣書曰昔唐元和進士費冠卿以祿不逮親永懷罔極隱於池陽九華山長慶中御史李行修薦舉冠卿力辭竟許終隱愚願效之吏部復言聖世禮賢首崇恬退必使清節之臣得被寵榮乃可以廉頑立懦風勸士人詔授禮部儀制司主事族病痊錄用後推南寶丞報至中立已逝矣所著有易銓古本學庸大旨論格物書性氣說諸書

閩書

縣令楊文銳先生鍾

楊鏹字文銳建安人繇貢士授靈武知縣事兄銑友愛情切自少至老手不釋卷建安人士多出其門

通判黃元泰先生三陽

黃三陽字元泰建陽人黃端公之後繇恩貢任安吉州同知罷運儲常例履畝均輸悉心經營兩視州縣篆廉而有惠擢保定判卒于官吉人祀之三陽通易詩禮三經弱冠便開講席從遊千數三經並授他如天文地理陰陽醫卜靡不究心在官邸署蕭然一編自適所著有

易禮詩各講義

閩書 道南源委

田仕濟先生汝楫

田汝楫字仕濟建安人喜讀書尤攻性理之學每見地上行蟻輒迂跡避之家畜雞豚非祀先奉親待賓不忍耗殺時時出遊山水吟咏嘯傲盡醉而歸子忠

閩書

巡撫魏禹卿先生濬

魏濬字禹卿松溪人萬曆甲辰進士初授戶部主事陞郎中出為廣西提學陞江西副使尋乞歸起山東布政



司叅議遷湖廣按察使時黔蜀交訐苗蠻礦徒表裏為患濬諭以德意礦徒解散焚其巢千七百餘所陞江西左布政擢都察院右僉都御史巡撫湖廣病卒年七十二通志

訓導吳世憲先生從周

吳從周字世憲甌寧人博學善文以孝友為學使宗臣所稱萬厯中應貢廷試第一訓導海鹽與友生商榷令古致仕杜門所著有石匏集史辨書疑四卷

教授李去華先生韓

李韓字去華崇安人天啓貢士崇禎壬午試南雍第一  
選福州教授棄官閉門謝人事著易導史略若干卷

閩中理學淵源考卷八十六